

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 104419 25 K
Visoko, 24.06.2025.

U IME FEDERACIJE BOSNE I HERCEGOVINE

Općinski sud u Visokom, sudija Miroslav Savić, sa zapisničarem Azrom Karasalihović, u krivičnom postupku protiv optuženog M.K., zbog krivičnog djela „Neovlaštena prodaja i stavljanje u promet opojnih droga“ iz člana 238. stav 1. Krivičnog zakona Federacije FBiH¹, rješavajući po optužnici Kantonalnog tužilaštva Zenica broj: T04 0 KT 0057075 24 od 08.11.2024.godine, a koja je potvrđena od strana ovog suda dana 13.11.2024.godine, nakon održanog ročišta za razmatranje sporazuma o priznanju krivice i pretresa za izricanje krivičnopravne sankcije održanog dana 24.06.2025. godine, u prisustvu kantonalnog tužioca Branislava Tomaša, te optuženog i njegovog branioca po službenoj dužnosti advokata Tarika Lemeša iz Visokog, javno objavio sljedeću:

PRESUDU

Optuženi M.K., zvan „M.“, sin A. i majke M. rođene M., rođen godine u S., nastanjen u B., B. bb, pismen, sa završenom srednjom školom, po zanimanju rudar, razveden, otac troje mlđb. djece, lošeg imovnog stanja, po nacionalnosti Bošnjak, državljanin BiH, JMB: ..., osuđivan 2007. godine za krivično djelo iz člana 293. stav 1. KZ F BiH na novčanu kaznu od 500 KM, uvjetno jedan godina i 2012. godine za krivično djelo iz člana 362. stav 2. u vezi sa stavom KZ F BiH na kaznu zatvora u trajanju od 6 mjeseci, uvjetno dvije godine,

KRIV JE

što je,

dana 09.02.2024. godine, u V., na regionalnom putu R 444 u ulici Z., u 00:05 sati, suprotno odredbama člana 4. stav 1., 2, 3. i 5., a u vezi sa odredbom člana 20. Zakona o sprečavanju i suzbijanju zloupotrebe opojnih droga, dok se nalazio kao suvozač u pmv marke „WV Golf“ reg. oznaka ..., kojim je upravljao, neovlašteno radi dalje prodaje kod sebe posjedovao opojnu drogu „amfetamin“ upakovanu u jedan prozirni pvc paketić neto mase 15,052 grama i jedan alufolijski paketić neto mase 0,467 grama, iako je znao i bio svjestan da je posjedovanje opojne droge radi dalje prodaje zakonom zabranjena, što je i htio, a koja opojna droga je pod rednim brojem 1., Liste opojnih droga iz Tabele 2., Liste

¹ Krivični zakon FBiH (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17 i 31/2013)

psihotropnih stvari proglašena takvom, koju drogu je dobrovoljno predao policijskim službenicima PS Vareš,

Čime je počinila krivično djelo neovlaštena proizvodnja i stavljanje u promet opojnih droga iz člana 238. stav 1. KZ F BiH.

Pa sud optuženom na osnovu istog zakonskog propisa te na osnovu članova: 42., 43. i 49. Krivičnog zakona Federacije Bosne i Hercegovine, izriče:

KAZNA ZATVORA U TRAJANJU OD 1 (JEDNE) GODINE

Na osnovu člana 78. stav 1. i člana 238. stav 4. KZ F BiH oduzme opojna droga „amfetamin“ ukupne neto mase 15,019 grama i 0,440 grama preostala nakon vještačenja, koja opojna droga se nalazi deponovana u PS Vareš i koja će po pravosnažnosti presude biti uništena.

Na osnovu člana 202. stav 1 Zakona o krivičnom postupku Federacije FBiH², optuženi M.K. je dužan da naknadi troškove postupka u vidu troškova branioca po službenoj dužnosti u iznosu koji će sud odrediti posebnim rješenjem o visini troškova kao i troškove paušala u iznosu od 50,00 KM sve u roku od 30 dana od dana pravosnažnosti.

Obrazloženje

Optužnicom Kantonalnog tužilaštva Zeničko-dobojskog kantona broj T04 0 KT 57075 24 od 08.11.2024. godine, M.K. , zbog krivičnog djela „Neovlaštena prodaja i stavljanje u promet opojnih droga“ iz člana 238. stav 1. Krivičnog zakona Federacije Bosne i Hercegovine, bliže opisanom u izreci presude. Predmeta optužnica je potvrđena dana 08.11.2024. godine, nakon čega se optužena na ročištu za izjašnjenje o krivici izjasnio da nije kriv, te je predmet upućen sudiji radi zakazivanja glavnog pretresa.

Dana 24.06.2025. godine, sud je zaprimio sporazum o priznanju krivice broj T04 0 KT 0057075 24 koji je optuženi M.K., u prisustvu branioca Tarika Lemeša, advokata iz Visokog, zaključio sa Kantonalnim tužilaštvom Zeničko-dobojskog kantona dana 26.03.2025. godine.

Optuženi je sporazumom priznao krivicu za krivičnopravne radnje opisane u optužnici i u pogledu pravne kvalifikacije, te je prihvatio da mu se za predmetno krivično djelo izrekne kazna zatvora u trajanju od jedne godine.

Na održanom ročištu za razmatranje sporazuma o priznanju krivice, sud je na osnovu člana 246. ZKP ispitao da li su ispunjeni uslovi propisani tačkama a) do e) navedene odredbe. U tom smislu sud je utvrdio da je optuženi u prisustvu branioca zaključio sporazum dobrovoljno, svjesno i sa razumjevanjem, nakon što je upoznat sa mogućim

² Zakon o krivičnom postupku FBiH (Službene novine FBiH, broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14)

posljedicama, koje se odnose na činjenicu da ne može uložiti žalbu na vrstu procesa i sankciju koja je dogovorena sporazumom, kao i na moguće posljedice vezano za eventualnu naknadu troškova postupka a što je konstatovano i pod tačkom III sporazuma o priznanju krivice. Konačno, sud je ispitao i da li je predložena krivičnopravna sankcija u skladu sa odredbom člana 246. stav 3. ZKP FBiH. Optuženi u prisustvu branioca, kao i postupajući tužilac su na zapisnik izjavili da u cjelosti ostaju kod zaključenog sporazuma o priznanju krivice.

Kantonalni tužilac je u spis suda uložio materijalne dokaze zapisnik o uviđaju PS Vareš broj: 08-02-12/2-3-24 od 09.02.2024. godine, potvrdu o privremenom oduzimanju predmeta PS Vareš broj: 08-02-12/2-03-2-06/24 od 09.02.2024. godine na ime M.K., zapisnik o dobrovoljnoj predaji predmeta PS Vareš broj: 08-02-12/2-03-2-06-1/24 od 09.02.2024. godine, zapisnik o otvaranju i pregledu privremeno oduzetih predmeta i dokumentacije PS Vareš od 19.02.2024. godine, naredba Kantonalnog tužiteljstva ZDK broj: T04 0 KTA 0057075 24 od 12.02.2024. godine, fotodokumentaciju PS Vareš broj: 08-02-12/2-06/24 od 09.02.2024. godine, i izvod iz kaznene evidencije za osumnjičenog M.K.a MUP Kantona Sarajevo broj: 02/5-2-03-8-2/3894 od 20.08.2024. godine, zapisnik o saslušanju svjedoka T.H. PS Vareš broj: 08-02-12/2-17/24 od 09.02.2024. godine, te nalaz hemijskog vještačenja FUP Sarajevo, Centar za forenzička ispitivanja, vještačenja i istraživanja broj: 09-18/2-03-5-455 od 02.04.2024. godine

Nakon saslušanja stranaka i branioca, te uvidom u materijalne dokaze, sud je prihvatio sporazum o priznanju krivice broj T04 0 KT 0057075 24 od 26.03.2025. godine, koji je optuženi u prisustvu branioca zaključio sa postupajućim tužiocem Kantonalnog tužilaštva Zeničko-dobojskog kantona.

Sud je zaključio da ima dovoljno dokaza koji potkrepljuju krivicu optuženog, kao i da je sporazum zaključen dobrovoljno svjesno i sa razumevanjem. Zaključak da je optuženi počinio krivičnopravne radnje koje mu se stavljaju na teret i za koje je oglašen krivim u izreci ove presude, sud zasniva na prihvatanju izjave optuženog, te dovodeći njegovo priznanje u vezu sa materijalnim dokazima uloženim u spis. S tim u vezi, sud je utvrdio da se u radnjama optuženog ostvaruju sva obilježja djela koje mu se stavlja na teret. Takođe, sud nalazi da je u inkriminisanoj periodu optuženi postupao sa umišljajem, odnosno sa sviješću i voljom da ostvari zabranjenu posledicu.

Na pretresu za izricanje krivičnopravne sankcije tužilac, optuženi i branilac, su saglasno predložili da se optuženom izrekne sankcija kako je to predloženo i dogovoreno u sporazumu o priznanju krivice.

Rukovodeći se ciljevima specijalne i generalne prevencije, sud je imao u vidu sve „okolnosti koje utiču da kazna bude manja ili veća“, prema članu 49. stav 1. KZ F BiH. Sud je od olakšavajućih priznanje izvršenja krivičnog djela. Zaključivanjem sporazuma u ranoj fazi postupka optuženi je doprineo bržem i efikasnijem okončanju krivičnog postupka. Pored navedenog, sud je imao u ranije osude optuženog ali iste nije uzimao kao otežavajuću okolnost s obzirom da su u pogledu istih ispunjeni uslovi za brisanje. Nasuprot tome sud nije našao da postoje otežavajuće okolnosti.

Nakon ocjene svih navedenih okolnosti, te uzevši u obzir raspon propisane kazne za krivično djelo koje se optuženom stavlja na teret, sud je zaključio da će se kaznom zatvora u trajanju od jedne godine ostvariti svrha krivičnopravnih sankcija. Navedena kazna, po ocjeni suda, odgovara stepenu krivice optuženog i pomenutim olakšavajućim okolnostima, zbog čega sud smatra da će se istom postići svrha kažnjavanja izražena u članu 42. KZ F BiH, odnosno da će se u dovoljnoj mjeri uticati na učinioce i ostale da ne čine krivična djela, izraziti društvena osuda počinjenog krivičnog djela i uticati na razvijanje svijesti građana o pogibeljnosti krivičnih djela i pravednosti kažnjavanja učinilaca.

Na osnovu člana 202. stav 1 Zakona o krivičnom postupku Federacije FBiH³, optuženi je obavezan da naknadi troškove postupka u vidu troškova branioca po službenoj dužnosti u iznosu koji će sud odrediti posebnim rješenjem o visini troškova jer u ovoj fazi nedostaju podaci o visini istih. Sud je optuženog obavezao i na naplatu troškova sudskog paušala u iznosu od 50,00 KM, a sve u roku od 30 dana od dana pravosnažnosti.

Zapisničar,
Azra Karasalihović

Sudija
Miroslav Savić

Pravna pouka:

Protiv ove presude može se izjaviti žalba Kantonalnom sudu u Zenici u roku od 15 dana od dana prijema pismenog otpravka presude, a žalba se podnosi putem ovog Suda u tri primjerka. Žalba se može izjaviti iz svih zakonskih razloga, osim u pogledu izrečene krivičnopravne sankcije.

³ Zakon o krivičnom postupku FBiH (Službene novine FBiH, broj 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14)